



Komunikadu Imprensa
Suku Mehara Tutuala
19 Setembru 2019

Partisipante hosi Suku Mehara konsidera materia sira ne'ebé JSMP fornese importante tebes hodi ajuda comunidade sira bele redús violénsia doméstika

Iha 12 Setembru 2019, JSMP realiza treinamentu kona-ba demokrásia, kna'ar órgaun soberanu sira-nian, partisipasaun públiku iha prosesu halo lei no asesu ba justisa formál ba membru konsellu suku no membru comunidade sira iha Suku Mehara, Postu Administrativu Tutuala, Munisípiu Lautem.

Partisipante sira ne'ebé tuir treinamnetu ne'e hamutuk ema na'in 30 kompostu husi mane na'in 12 no feto na'in 18. Aleinde membru sira estrutura konsellu suku nian, partisipa mós membru Ofisiál Polísia Suku (OPS) na'in 1.

Treinamentu ne'e ho objetivu atu hasa'e koñesimentu membru sira konsellu suku no membru comunidade sira kona-ba saida mak demokrásia, kna'ar órgaun soberanu no oinsá públiku nia partisipasaun iha prosesu halo lei no asesu ba justisa formál.

“Treinamentu ne'e nu'udar meu ida hodi ajuda membru konsellu suku sira atu hakle'an liután sira-nia koñesimentu ba asuntu relevante sira, partikularmente relasiona ho sira-nia knaar no kompeténsia atu rezolve problema sira comunidade nian, nune'e, sira bele trata no atua problema sira ne'ebé mosu tuir lei, mekanizmu ne'ebé loos no apropiadu, “dehan Diretór interinu JSMP , Casimiro dos Santos .

Xefe Suku Mehara Sr. Ze Meigo Neto haktuir katak nia agradese no orgulhu ho prezensa JSMP nia iha sira-nia leet tanba bele fornese informasaun importante sira ne'e ba membru konsellu suku no comunidade sira. Xefe suku ne'e apela ba partisipante sira atu fó atensaun másimu ba informaun sira ne'ebé JSMP apresenta nune'e bele hatene kle'an kona-ba informaun sira ne'ebé JSMP fahe no kanaliza tuir nia dalan tanba durante ne'e membru konsellu suku sira atende comunidade nia problema maibé la kanaliza tuir nia dalan.

Iha diskusaun iha parte sesaun kona-ba demokrásia nian, kestaun ne'ebé partisipante sira foti no preokupa mak kona-bá membru órgaun soberanu sira kuandu komete krime sira iha imunidade kompara ho comunidade ki'ik sira. JSMP hatan ba kestaun ne'e katak tuir ita-nia Lei Inan (Konstituisaun) iha Artigu 16 kona-ba universalidade no igualidade prevee katak sidadaun hotu-hotu hanesan iha lei nia oin no iha direitu no obrigasaun hanesan katak ema hotu hanesan iha lei nia oin la hare ba nia seksu, orijin, estadu sívil, pozisaun sosiál, ekonómiku, hanoin polítiku, ideolojia ka relijaun. Provizaun ida ne'e hatuur prinsípiu kona-ba tratamentu ne'ebé hanesan tuir Konstituisaun no Lei sira iha Estadu Direitu Demokrátiku.

Mezmu nune'e, atu asegura fursionamentu ne'ebé di'ak no efetivu hosi órgaun soberanu sira-nian, Konstituisaun mós fornese provizaun sira ne'ebé atribui imunidade ba membru sira órgaun soberanu nian hanesan Parlamentu Nasionál, Governu, nsst. Intensaun hosi provizaun sira ne'e mak atu proteje membru órgaun soberanu sira ne'e hodi hala'o sira-nia knaar no kompeténsia

hanesan prevee iha Artigu 94 Konstituisaun kona-ba imunidade ba membru Parlamentu Nasionál no imunidade Parlamentu nian ne'e regula ho spesifikamente iha Artigu 8 Lei Nú. 15/2009 ne'ebé altera ho Lei Nú. 1/2016 kona-ba rejimentu Parlamentu nian. Artigu 113 no 114 K-RDTL kona-ba responsabilidade kriminál no imunidade membru Governu sira-nian.

Provizaun sira kona-ba imunidade Parlamentu nian prevee katak membru deputadu sira só iha responsabilidade kriminál ba krime ne'ebé nia pena prizaun aas liu tinan 5 no bainhira Parlamentu Nasionál hasai imunidade liuhosi votu maiória iha plenaria. Bainhira Parlamentu Nasionál la hasai mak membru deputadu ne'e sei la ba tuir prosesu justisa. Enkuantu membru governu sira-nian provizaun Artigu 113 alinea 1) K-RDTL prevee katak membru governu ne'e komete krime ho pena prizaun aas liu tinan 2 sei suspensu hosi nia funsaun hodi ba tuir prosesu justisa no iha alinea 2) prevee katak bainhira krime ne'e nia pena prizaun to'o de'it ba tinan 2 sei kabe ba Parlamentu Nasionál atu hasai imunidade hodi ba tuir prosesu justisa. Mezmuke sira la tuir prosesu justisa durante mandatu, bainhira sira-nia mandatu hotu, sira la iha ona imunidade no sei ba responsabiliza ba sira-nia aktu krime ne'e.

Kestaun sira seluk ne'ebé partisipante sira foti durante hato'o sira-nia preokupasaun relasiona ho asuntu kona-bá comunidade hatene de'it mak sira-nia direitu maibé lahatene sira nia devér, oinsá rezolve kazu infantésídiu ne'ebé kontinua buras, divórsiu ne'ebé barak akontese iha comunidade no oinsá responsabilidade aman nian ba oan sira.

Hatán ba kestaun hirak ne'e, JSMP esplika katak ita orgullu tanba ita-nia Estadu ne'e funsiona tuir lei no sistema demokrásia signifika soberania mai hosi povu no ezerse tuir lei haruka, Iha sistema demokrásia ema hotu-hotu iha direitu no devér hanesan, katak ema hotu-hotu iha direitu ba moris, saúde, edukasaun, seguransa, liberdade no seluk-seluktan maibé iha devér atu respeitu ema seluk tanba ema seluk mós iha direitu hanesan ho ita. Ema ida-idak iha direitu ba nia-an no ba ita nia sasan sira maibé laiha direitu ba malu katak ita laiha direitu ba ita nia fen ka laen, direitu ba ita nia oan ka ba ema seluk, sé ita iha direitu ba sira (feen, laen oan ka ema seluk) ita bele deside nia vida, tanba ne'e tenki hatene katak ita só iha de'it obrigasaun/devér atu respeitu, kuidadu no proteze ba sira.

Kestaun kona-ba kazu infantésídiu kontinua buras iha comunidade, JSMP esplika katak bebe ida iha nia-inan nian kanotak, nia iha ona direitu ba mórís tanba ne'e kualker sé de'it mak halo ka kontribui halo abortu ka oho bebe hafoin partu sei hetan kastigu tuir lei penál Timor-Leste nian. Autór husi kazu infantésídiu barak mak agora daudaun tama iha prizaun no balun sei iha faze investigasaun tanba sira komete krime infantésídiu. JSMP mós esplika ba partisipante sira katak inan-aman no autóridade suku iha papél boot atu fó edukasaun morál ba jovem sira iha ida-idak nia família ka suku atu prevene krime infantésídiu iha futuru no tenki kontribui/fornese informasaun ba autoridade tribunál nune'e bele fó desizaun ida justu ba vítima krime infantésídiu sira.

Kona-ba kazu feen-laen soe malu, JSMP esplika katak lei la bandu atu ema fahe malu/divórsiu, maibé kuandu akontese divórsiu, tantu feen no ka la'en iha obrigasaun hanesan atu fó alimentasaun ba oan sira ne'ebé sira abandona, bainhira sira la fó alimentasaun ba menór sira, sira sei hatán ba krime ida la halo tuir obrigasaun alimentár tuir Artigu 225 Kódigu Penál.

Iha sesaun enseramentu ba treinamentu Sr. Ze Meigo Neto ne'ebé nu'udar xefe suku agradese ba prezensa JSMP ne'ebé fó ona informasaun di'ak ba autoridade lokál, membru suku, OPS, inklui comunidade sira. Materia hosi treinamentu ida ne'e bele ajuda partisipante sira bele aplika iha moris loraun loraun liuliu fen laen labele baku malu ka bele redus violénsia doméstika.

Atividade ne'e realiza tanba hetan apoiu husi Fundu Apoiu Sosiedade Sivil Gabinete Primeiru Ministru.

Atu hetan informasaun liutan favór kontaktu direktamente:

Casimiro dos Santos

Diretór interino JSMP

Telefone: 3323883

www.jsmp.tl